

HENRI VI,
à Paris,
le 6 Septembre
1423.

(a) *Mandement de Henri VI, Roi d'Angleterre, soi-disant Roi de France, pour faire fabriquer en France & en Normandie, des Écus d'or nommez Salutz.*

HENRY, par la grace de Dieu, Roy de France & d'Angleterre, à noz amez & feaulx les Generaux-Maistres de noz Monnoyes: Salut & dilection. Comme pour aucunes causes à ce nous mouvans, par l'advis & deliberacion de nostre très-cher & très-ami Oncle *Jehan*, Regent nostredit Royaume de France, *Duc de Bedford*, & de nostre Grant Conseil, avons ordonné faire faire en nos Monnoyes de France & de Normandie, Deniers d'or fin à ung marc de carat de remede, nommé Salutz ayans cours pour XXII sols VI deniers tournois la piece, & de LXX deniers de poix au marc de Paris, aux Armes de France & d'Angleterre, de la forme des deniers d'or nommez Salutz, que faisons faire paravant ceste presente Ordonnance; pour ce est-il que nous vous mandons, commandons & expressement enjoignons par ces presentes, que tout le plus brief que faire se pourra, vous fâçies faire, ouvrir & monnoyer en nos Monnoyes de France & de Normandie, où vous verrez qu'il sera expedient de ouvrir or pour le present, lesdits Deniers d'or fin, de la forme, poix & loy dessusdits, avec les monnoyes blanches que à present faisons faire en nosdites Monnoyes; en donnant & faisant donner aux Changeurs & Marchans frequentans nosdites Monnoyes, pour chacun marc d'or fin LXXVIII livres tournois, & aux Ouvriers & Monnoyers tel salaire pour leur ouvrage & monnoyaige, comme vous verrez qu'il sera à faire de raison; en meslant en iceulx Deniers d'or telles differences comme bon vous semblera. De ce faire vous donnons pouvoir & mandement especial: mandons & commandons à tous noz Justiciers, Officiers & Subjectz, que à vous en ce faisant obeissent & entendent diligemment. *Donné à Paris, le VI. jour de Septembre, l'an de grace mil III. & XXIII, & de nostre regne le premier.* Par le Roy, à la relation du Grant Conseil tenu par Monf. le Regent *Duc de Bedford*.
J. DE RIVEL.

NOTE.

(a) Registre E de la Cour des Monnoies de Paris, fol. 12 vingt 1 r. [241]
Avant ces Lettres, il y a: *Mandement pour faire Salutz de LXX au marc, ayans cours pour XXII sols VI deniers tournois la piece.*

HENRI VI,
à Paris,
le 6 Septembre
1423.

(a) *Mandement de Henri VI, Roi d'Angleterre, soi-disant Roi de France, par lequel il fixe le prix de diverses Monnoies.*

HENRY, par la grace de Dieu, Roy de France & d'Angleterre, au *Prevoist de Paris* ou à son Lieutenant: Salut. Pour ce que tousjours nous destrons la chose publique de nostre Royaume de France estre maintenuë & gardée en toute bonne police, tant au regard des Monnoyes comme autrement; & voyans clerement que l'ennemy & adversaire de nous & de nostredit Royaume, qui se ingere de porter noz pleines Armes de France, s'est efforcé & efforce chacun jour de faire faire & forger à nosdites Armes de France, Doubles Deniers de deux tournois la piece, de moindre poix & aloi que ne sont ceux que nostre très-cher Seigneur & Ayeul le Roy Charles, que Dieu pardoint, avoit fait faire en son vivant; pour quoy, nous & toute la chose publique de nostre Royaume de France en avons esté grandement deceuz & dommaigez & pourrions encores plus estre se par nous n'y estoit pourveu de remede; & pour ce, nous voulans obvier aux fraudes & deceptions de nostredit ennemy & adversaire, principalement pour le bien & utilité de nostre peuple, & eschever qu'il ne soit fraudé & deceu en prenant lesdits doubles deniers pour plus hault pris qu'ilz ne valent, jaçoit ce que ceux que nostredit feu Seigneur & Ayeul, & aussi feu nostre très-cher Seigneur & Pere, que Dieu pardoint, faisoient faire & forger, tant en France comme en Normandie, estoient & sont de bon poix & aloi: par l'advis & deliberacion des Gens de nostre Grant Conseil, & autres en ce congnoissans, pour ce assemblez par plusieurs

NOTE.

(a) Registre E de la Cour des Monnoies de Paris, fol. 12 vingt 2 v. [242]
Avant ces Lettres, il y a: *Mandement par lequel est ordonné de mettre & allouer six Deniers Doubles tournois pour ung Blanc de x deniers tournois la piece, & trois Doubles pour ung petit Blanc; aussi est donné cours aux Salutz pour XXXI sols VI deniers tournois la piece, & aux deniers noirs nommez Trechins pour II deniers Parisijs la piece.*